



Vischnaunca
Tujetsch

Protocol dalla 16. radunonza da vischnaunca

dils 20 da matg 2026

allas 19.00 en Sala Cristalla a Sedrun

**Protocol nr. 16 dalla radunonza da vischnaunca dils 20 da matg 2026
allas 19.00 entochen allas 21.30
ella Sala Cristalla a Sedrun**

Presidi: Martin Cavegn (president communal)

Protocollista: Simona Giossi (menadra administraziun)

Dumbravuschs: Maurin Cavegn, commember dalla cumissiun da gestiun
Reto Schmid, commember dalla cumissiun da gestiun

Presents: 38

Perstgisas: Silvio Schmid, president dalla cumissiun da gestiun

Tractandas:

1. Beinvegns e constataziuns
2. Protocol dalla radunonza da vischnaunca nr. 14 dils 25 da mars 2026
3. Approbaziun dil rendaquen 2025 dalla Vischnaunca Tujetsch
4. Approbaziun dil rendaquen 2025 dall'Energia Alpina
5. Revisiun parziala dalla lescha (sulettamein in artechel) e dil regulativ davart la taxa da hosps e la taxa da turissem
6. Orientaziuns
7. Varia

Tractanda 1 Beinvegni e constataziuns

Il president communal fa in cordial beinvegni a tuttas convischinas e tuts convischins sco era als commembers dalla cumissiun da gestiun tier la 16-avla radunonza da vischnaunca dil trienni 2023-2026.

Tractanda 2 Approbaziun dil protocol dalla radunonza da vischnaunca nr. 14 dils 25 da mars 2026

Suenter ch'il protocol nr. 14 dils 25 da mars 2026 ei vegnius publicaus en nies fegl official La Tuatschina nr. 8 dils 17 d'avrel 2026 ein neginas protestas vegnidas inoltradas el decuors da 30 dis dapi la publicaziun. Il protocol ei cheutras approbaus.

Tractanda 3 Approbaziun dil rendaquen 2025 dalla Vischnaunca Tujetsch

Il quen da gudogn e sperdita pigl onn 2025 siara cun expensas totalas da frs. 19'318'305.72 visavi entradas totalas da frs. 19'568'129.45. Aschia resulta in gudogn da frs. 249'823.73. El preventiv 2025 era previu in gudogn da frs. 37'278. Il quen d'investiziun dalla facultad administrativa cumpeglia expensas per investiziuns egl import da frs. 5'281'749.77 ed entradas da subvenziuns e contribuziuns da frs. 535'764.06, aschia ch'ei resultan investiziuns nettas da frs. 4'745'985.71. El preventiv 2025 eran investiziuns da frs. 7'222'000.00 previdas. In motiv ei che la projectaziun dalla sanaziun e valurisaziun dil baghetg da scola a Sedrun ha custau in ton pli pauc. Plinavon han ins buca saviu entscheiver culla dislocaziun dils dutgs a Dieni/Rueras. In ulteriur motiv ei ch'ils quens per la procedura da perimeter vegnan mintgamai pér pagai igl onn sissu. Il deposit ella prefinanziaziun dil capital agen schai tier frs. 1.75 milliuns. Cunquei ch'igl onn 2025 ha mussau ora in bien gudogn eis ei stau pusseivel da far las remessas per la piazza da giugs Sedrun e pil parc da freestyle Dulezi. Omisdus projects ein vegni approbai dalla radunonza da vischnaunca dil preventiv, sut la cundiziun ch'ei vegnien pér realisai sch'il quen 2025 seigi buns e lubeschi da far la prefinanziaziun. Plinavon han ins saviu reducir ils emprests a liunga vesta per frs. 76'000.00.

Il president communal explichescha las entradas ed expensas dallas singulas funcziuns dil quen da gudogn e sperdita e fa attents sin posiziuns, nua ch'ei ha dau ina differenza enviers il preventiv.

Vinavon vegn il rendaquen per la sanaziun dil Bogn Sedrun explicaus dil president communal. La planisaziun per la sanaziun dil Bogn Sedrun ha custau dapli che quei ch'ei era vegniu concediu dil cussegl da vischnaunca da lezs temps. Per la sanaziun ei vegniu

concediu in credit da 9.8 milliuns cun +/- 15%. Entochen alla fin ha il project custau frs. 11.9 milliuns.

Il president declara il suandont: Sche la vischnaunca realisava projects interns, saveva ella buca far valer la pretaglia (Vorsteuer). En ina decisiun dalla dertgira federala ha ei denton dau ina decisiun ch'ins astgi far valer la tala. Sin fundament da quella decisiun ha la suprastanza communal incaricau la firma PricewaterhouseCoopers GmbH (PWC) da sclarir quei cass pil Bogn Sedrun. Quei sclariment ha giu success ed ins ha saviu spargnar frs. 732'000.00. Suentar covid ei la carischia carschida nundetgamein. La clausula da prezis ch'ei vegnida confirmada digl uffeci da vischnauncas ha ferton lubiu alla suprastanza communal da tuttina saver surdar las lavurs. Quella clausula regla che sch'in project vegni pli cars, e quei sulettamein per motivs dalla carischia, astgi il project vegnir realisaus. Sco facit san ins dir ch'ils cuosts per la sanaziun dil Bogn Sedrun seigien vegni teni en fetg bein ed ins ha saviu serrar giu il quen cun meins-cuosts da frs. 1'194'174.00.

Debatta d'entrada:

Negina debatta d'entrada ei giavischada.

Il president communal numna mintga sparta dil quen da gudogn e sperdita e supplichescha ils presents da tschentiar damondas. In convischin vul saver tier la sparta 3 (cultura, sport e temps liber, baselgia) daco che las entradas dil Bogn Sedrun seigien rodund per frs. 100'000 pli bassas che previu el preventiv. El supponi che quei hagi da far culla Golden Card.

Il president communal declara che la Golden Card vegni serrada giu pils 31 da matg 2026. La cumpart dil bogn sappi pia pér vegnir risguardada el quen 2026. Il gerau dil departament economia e turissem declara vinavon che las entradas seigien carschidas per rodund 30-35%. Ina constataziun ei che dapi l'introducziun dalla Golden Card vegn il Bogn Sedrun nezegiaus bia dapli ch'avon. Ei setschenta era la damonda sch'ins vegli proxim onn schar aviert il bogn durant las vacanzas da primavera perquei ch'ei hagi giu fetg paucs visitaders. Ord vesta finanziaria fuss ei stau pli prudent d'arver il bogn cura ch'ils camps dalla Bassa eran ella val.

Il president communal pren il plaid pertuccont la Residenza Dulezi. La vischnaunca sorprendi il deficit dalla residenza. Aschia hagian ins saviu far remessas per haver avunda liquiditad per saver garantir las sanaziuns dil baghetg. Quest onn ha la vischnaunca supriu il deficit da frs. 57'000.00. Ins stoppi esser pertscharts che nus hagian frs. 6.1 milliuns deivet sigl object. Ils tscheins dallas habitaziuns seigien aschi aults sco pusseivel. Plinavon vegni mirau d'occupar las habitaziuns aschi spert sco pusseivel, aschia ch'ei restien buca vitas memia ditg.

Silsuenter vegn il rapport dalla cumissiun da gestiun prelegius. Tenor il giudicament dalla cumissiun da gestiun corrispundi il quen communal che siari per ils 31 da december 2025 allas prescripziuns dallas leschas vertentas. La cumissiun da gestiun propoia alla radunonza da vischnaunca d'approbar il quen annual 2025 e da dar scarica alla suprastanza communal, als ulteriurs organs communs responsabels sco era all'administraziun communal.

Votaziun

La radunonza da vischnaunca ha approbau unanimamein il quen digl onn 2025 dalla Vischnaunca Tujetsch.

La radunonza da vischnaunca ha dau scarica cun 37 vuschs gie ed ina abstenziun a tuts organs communs.

La radunonza da vischnaunca ha priu per enconuschientscha unanimamein ils quens annuals 2025 dalla Residenza Dulezi SA e dalla Sedrun Disentis Tourismus SA.

Tractanda 4 Approbaziun dil rendaquen 2025 dall'Energia Alpina

Il president dil cussegl d'administraziun dall'Energia Alpina orientescha davart las impurtantas midadas d'in intensiv onn 2025. Ina da quellas midadas ei la nova cumparsa dalla Energia Alpina e la serrada dalla stizun ch'ei utgida alla Aventura Energia. Plinavon ei la finamira da Sedrun Solar contonschida e schizun dapli measas hagian saviu vegnir montadas ch'il minimum ch'ins havess stuiu. Ina gronda sfida per l'Energia Alpina ein midadas da leschas sin basa federala che san haver enormas consequenzas per ina pintga firma.

Il meinafatschenta dall'Energia Alpina pren il plaid e va en silla problematica che tut vegni regulau pli e pli fetg e quei mondi sin donn e cuost dalla persuna che retili l'energia e stoppi pagar dapli. Plinavon stoppien ils quens adina vegnir mussai ora a moda pli transparenta ed il davos vegni negin pli ordlunder.

Il meinafatschenta declara las cefras indicativas ed en general il quen da gudogn e sperdita, la bilanza e las investiziuns. L'Energia Alpina siara cun expensas totalas da menaschi da frs. 9'891'025.00 visavi entradas totalas da menaschi da frs. 12'378'020.00. Suenter las deducziuns e remessas da frs. 2'134'212.00 resulta in gudogn digl onn da frs. 958'137.00. Il gudogn per mauns dalla vischnaunca hagi saviu vegnir alzaus naven da frs. 500'000 sin frs. 700'000. Avon Sedrun Solar havevi l'Energia Alpina cuosts d'investiziun da rodond frs. 2 milliuns ed ussa da rodond frs. 7 milliuns.

Per Sedrun Solar seigi ei stau in fetg intensiv- mo era in interessant onn. Ei seigi vegniu fatg investiziuns da frs. 34 milliuns e la Confederaziun hagi gia pagau frs. 20 milliuns en favur dil project. En tut seigien 1'003 measas vegnidas montadas ed in havessi stuiu montar minimum

600 measas per vegnir sils 10% producziun d'energia che la Confederaziun havevi dau avon per ch'ella paghi la contribuziun.

Il meinafatschenta declara ch'ina gronda sfida seigi la vendita d'energia. La problematica seigi ch'ins stoppi vender oz l'energia silla basa da damaun e quella seigi per part enorm greva da calcular.

Il meinafatschenta dat vinavon in sguard sin in niev project ensemen cull'Axpo, numnadamein battarias che vegnessen installadas sper il baghetg dalla centrala secundara. Igl emprem stoppi la Swissgrid denton rinforzar la reit per ch'ins sappi insumma spisgentar tala e quei capeta pér igl onn 2029. Il grond avantatg ei che quellas battarias savessien arcunar enorm bia energia ed aschia savessien ins calcular meglier la vendita da tala.

Debatta d'entrada:

Marcel Schmid engrazia per las interessantas presentaziuns. Sco quei ch'el hagi gia pliras gadas menziunau en radunonzas da vischnaunca, vegli el aunc ina gada menziunar ils cuosts d'energia. El seigi pliras gadas staus tiel president communal e lez hagi detg ch'ils cuosts d'energia vegnien reduci per 30% cura che Sedrun Solar seigi finiu. Il president communal intervegn e di ch'el hagi franc detg ch'ils cuosts vegnien el futur reduci, denton buca gest per 30%.

Marcel Schmid cuntinuescha e constatescha che l'Energia Alpina fetschi gia dapi bia onns buns cashflows da rodund frs. 3 e 4 milliuns e ch'in tierz dalla energia vegni producida en vischnaunca. Igl onn 2021 pagavien ins 21 raps/kWh ed igl onn 2024 34 raps/kWh. Ils onns 70 cura ch'ins havevi baghegiu l'ovra Val Giuv hagian ins giu detg ch'ils prezis vegnien a restar andants - denton seigien quels dapi lu carschi per 60%.

Vinavon fa el menziun ch'el seigi buc adina sedaus sin ina ureglia aviarta tier l'Energia Alpina. Ei hagi zuar dau ina sera d'informaziun per consumers gronds (Grossabnehmer), denton seigi ad el aunc adina buca clar, nua ch'il quen vegni mussaus ora per l'energia che vegni producida en vischnaunca. Ei seigi vegniu declarau che quei seigi in auter quen ed il meinafatschenta dall'Energia Alpina hagi medemamein detg che cura che Sedrun Solar seigi baghegiu, vegnien ils cuosts reduci per 10%. Plinavon fa el attents che Mustér hagi buc ina fatschenta che produceschi energia.

Il meinafatschenta intervegn e menziunescha ch'el hagi mai informau davart ina reducziun da 10%. El declara danovamein, sco gia declarau pliras gadas a radunonzas da vischnaunca ni era alla sera d'informaziun per consumers gronds (Grossabnehmer), ch'ins drovi il cashflow per far investiziuns e buca per sbassar cuosts. Aschiglioc res-chien ins che la fatschenta mondi concuors enteifer paucs onns. Plinavon seigi l'Energia Alpina 15% pli bienmarcada ch'il vischin a Mustér. L'Energia Alpina seigi in toc pli bassa en cumparegliaziun cullas ulteriuras ovras el cantun Grischun. La problematica digl augment dils cuosts d'energia capeti tier la Confederaziun

a Berna, la quala creeschi novas leschas. 60% dils cuosts ch'ins paghi seigien dai avon e negin sappi midar enzatgei vid quels damai che quels seigien fixai ella lescha. Tier ina tala calculaziun stoppien ins risguardar tut ils consumers: pigns e gronds. Tut tschei fuss buca gest.

Medemamein pren il president communal il plaid e declara ch'il cashflow seigi claramain cheu per investir e baghegiar giu deivets ed astgi buc vegnir duvraus per reducir cuosts. Sch'ins fagessi quei riscassien ins ch'ina fatschenta mondi culs peis ensi. Plinavon fa il president communal attents ch'ei stetti liber als consumers gronds d'ir sin fiera libra per la cumpra d'energia.

Votaziun

La radunonza da vischnaunca ha approbau unanimamein il quen ed il rapport annual 2025 dall'Energia Alpina cun prender enconuschientscha dil rapport digl organ da revisiun.

La radunonza da vischnaunca ha approbau unanimamein l'utilisaziun dil gudogn dall'Energia Alpina ella summa da frs. 1'688'137.00 che preveda:

- **Ina conderschida alla Vischnaunca Tujetsch da frs. 700'000.00**
- **In'attribuziun allas reservas legalas da frs. 30'000.00**
- **In transport sil niev quen dall'Energia Alpina da frs. 958'137.00 (nova reserva suenter sura attribuziun frs. 3'325'880.00)**

La radunonza da vischnaunca ha dau scarica cun 36 vuschs gie e duas abstenziuns al cussegl d'administraziun dall'Energia Alpina.

Tractanda 5 Revisiun parziala dalla lescha (sulettamein in artechel) e dil regulativ davart la taxa da hosps e la taxa da turissem

Il president communal declara che la davosa revisiun dalla lescha davart la taxa da hosps e da turissem seigi ida en vigur igl onn 2015, pia avon rodund 10 onns. Cullas entradas ord la taxa da hosps vegni finanziau l'infrastructura e las prestaziuns turisticas. Quella taxa paghien surtut ils hosps da vacanzas e quei sur ils proprietaris da habitaziuns da vacanzas, hotels, camps e campadis. Igl alzament pertucca surtut la taxa da hosps e quei pil motiv che nus stoppien cun quella taxa reducir ils cuosts d'investiziun dall'infrastructura turistica. Per declarar quei alzament hagi ei dau ina sera d'informaziun per la hotellaria, camps, l'economia locala e pils indigens sco era ina sera d'informaziun pils commembers dallas IG Tujetsch e Mustér, nua che rodund 200 personas hagian priu part. Ei seigi numnadamein impurtont da declarar daco che quei alzament seigi inevitabels. Culla taxa da turissem vegni en emprema lingia finanziau il marketing dalla

destinaziun sco era promoviu eveniments da sport e cultura. Quella taxa paghien menaschis d'albiert, locaturs da habitaziuns da vacanzas e l'economia locala.

Il president communal declara quei sin fundament da diversas calculaziuns. Tujetsch e Mustér dettien ora ensemen per l'infrastructura turistica annualmein frs. 5.3 milliuns. Quei seigien buc investiziuns mobein cuosts annuals ch'ins cuvieri in ton culla taxa da hosps e quei che survarghi -cullas entradas dallas taglias ordinarias. En general duessien las entradas ord las taxas da hosps cuvierer ils cuosts d'infrastructura. Quei seigi denton buca pusseivel. Ils indigens nezegien medemamein l'infrastructura turistica e culla Golden Card seigien ins vegni d'eruir con gronda che quella cumpart seigi pil Bogn Sedrun e pil Center Fontauna. Il Bogn Sedrun vegni nezegiaus digl indigen per 10% ed il Center Fontauna per 40%.

Sedrun Disentis Tourismus (SDT) seigi la fatschenta che s'audi per 50% alla vischnaunca da Tujetsch e per 50% alla vischnaunca da Mustér. Els sorprendien l'informaziun al liug dil hosp, segidien cun events e sorprendien la reservaziun da habitaziuns da vacanzas ed il marketing. La vischnaunca da Tujetsch detti giu 70% dalla taxa da hosps (frs. 1 milliun) a SDT e vinavon 100% dalla taxa da turissem e tier Mustér seigi quei il medem. Pia retscheivi SDT rodund frs. 2 milliuns dallas duas vischnauncas e leu mondien frs. 600'00.00 directamein vinavon tier Andermatt-Sedrun-Disentis-Marketing (ASDM) per far la lavur da marketing. SDT seigi responsabels per la vendita dalla carta da hosps. Quella carta da hosps cuosti a SDT frs. 770'000.00. Quei seigien 35% ed ina fetg aulta cumpart. Quella carta cumpegli reducziuns sillas pendicularas, Bogn Sedrun, Center Fontauna sco era ulteriuras purschidas. Il president communal ei denton critics e dil meini ch'ins vendi buc avunda bein la carta da hosps. Puncto marketing savessien ins aunc far dapli.

Tujetsch hagi pia - cun risguardar tuttas expensas da rodund frs. 1.2 milliuns – in surpli da cuosts e quels stoppien vegnir reduci. La reducziun dall'entira summa seigi buca pusseivla. Lu havessen ins stuiu alzar la taxa da hosps per 80%. Las suprastonzas communalas da Tujetsch e Mustér seigien lu secunvegnidas da reducir quels cuosts per frs. 500'000.00 per vischnaunca. Quei seigi pia stau la basa da calculaziun che hagi occupau nus sur in pèr meins. Tenor lescha havessen ins adina astgau alzar las taxas pervia dalla carischia, denton seigi quei mai vegniu fatg enteifer 10 onns. Quei seigi buca stau prudent ed ins stuess en sesez mintg'onni analisar quellas taxas. Pertuccont la taxa da hosps seigien ins secunvegna d'alzar la tala per 30% plus la carischia. En tut detti quei 36.1%. Il davos seigien las suprastonzas communalas vegnidas al conclus d'alzar la taxa da turissem mo per la carischia da 6.1%. Per Tujetsch vegnessen ins d'alzar las entradas per rodund frs. 588'000.00 e per Mustér per rodund frs. 259'000.00. Il motiv seigi che Tujetsch hagi dapli habitaziuns da vacanzas ed aschia paghien ils possessurs dapli vid la taxa fundamentala e la taxa da hosps che sebase sils m² dallas habitaziuns da vacanzas. La taxa da hosps hagian ins alzau naven da frs. 4.00 sin frs. 5.00. Quei munta ch'il hotel paghi la pauschala sin fundament da ses letgs e da tschei maun retili el daniev dil hosp la taxa da

frs. 5.00 per cuvierer in ton da quella pauschala. L'idea ei: Dapli pernottaziuns ch'ins hagi e dapli ch'ins traigi en dil hosp. Il facit da quei alzament ei che nus stoppien reducir ils cuosts dalla infrastruttura turistica per omisduas vischnauncas.

Possessurs da secundas habitaziuns seigien pertuccai il pli fetg da quei alzament. Denton astgien ins buc emblidar che la valeta dallas habitaziuns da vacanzas seigi dublegiada e quei era grazia da tuttas investiziuns che vegnien fatgas davart la vischnaunca ed era dallas pendicularas. Vinavon vegni investiu bia daners ell'infrastruttura ed ella carta da hosps.

Debatta d'entrada:

Curdin Brugger pren il plaid ed explichescha sia situaziun sco hotelier e nua ch'el vesi la gronda problematica. El manegia che la hotellaria vegni da purtar quei alzament, denton stoppien ins tuttina esser pertscharts ch'ils hotels en Tujetsch seigien menaschis da stagiun. Il quen seigi sempels: Sch'il hotel hagi bia pernottaziuns, lu mondi il quen cugl alzament si. Cass cuntrari mettessi quei la hotellaria sutsu. In dils pli gronds problems seigi ch'entochen miez december e naven da miez mars hagi ei enorm paucas pernottaziuns. Nossa bellezza val vegni buca vendida bein. La carta da hosps seigi fetg buna la stad, denton stettien ils biars hosps mo ina notg e mondien lu puspei vinavon. Pia stuessen ins luvrar vid la qualitat dil turissem en nossa regiun enten metter entuorn ina strategia e vender buns products, aschia ch'ei carmali neutier il turist e surtut ch'il turist vegli star dapli che mo ina notg en nossa vischnaunca.

Il president communal pren il plaid e declara la situaziun vid igl exempel dil product cuorsa liunga. La suprastanza hagi decidiu d'investir ella loipa ed hagi cumprau dus novs canuns per far neiv. La loipa seigi pia semtgada il november. Uss hagian nus la problematica che nus sappien aunc crear aschi in bien product e far reclama, denton hagian negins hotels aviert durant quei temps. La capientscha seigi avon maun che la hotellaria siari durant la sesiun bassa; denton seigi la suprastanza claramain dil meini ch'ils frs. 600'000.00 che mondien tier ASDM pil marketing stoppien vegnir nezegiai meglier. Letgs fussen teoreticamein avon maun e quei ellas 1'400 habitaziuns da vacanzas che nus hagian en Tujetsch. La maioritad dallas habitaziuns vegnien denton schadas vi sco habitaziuns da vacanzas ed ils letgs restien freids. L'impurtonza dalla realisaziun dil resort Dieni seigi pia da gronda impurtonza per nossa val.

In convischin fa attents che sch'ins vegli dapli hosps, era durant la denterseziun, stoppien ins mirar comunablain ch'ei hagi purschidas che seigien aviertas.

Votaziun

- a) La radunonza da vischnaunca ha approbau cun 31 vuschs gie, 5 vuschs na e duas abstenziuns d'adattar las taxas da hosps naven dils 1 da schaner 2027 sco suonda:

1. Fixaziun dallas taxas da hosps digl artechel 8 dil regulativ davart la taxa da hosps e la taxa da turissem

Las tariffas per las singulas taxas da hosps e las differentas pauschalas muntan naven dils 1 da schaner 2027:

- a) la taxa da hosps per pernottaziun frs. 5.00
b) ils alloschaders pagan la suandonta taxa da hosps sco pauschala annuala (summas en frs.):

categoria	Altezia min. tochen max.	Naven da 1.1.2015	Naven da 1.1.2027
Hotels, per combra	450.00 – 900.00	450.00	612.45
Habitaziuns da vacanzas, il m ² dalla surfatscha da habitar netta (max. 150 m ²)	9.00 – 18.00	11.00	15.00
Combras privatas, per combra	350.00 – 600.00	350.00	476.35
Alloschaments da gruppa, per plaz da durmir	110.00 – 200.00	110.00	149.70
Campadis, per plaz da campar	250.00 – 400.00	250.00	340.25
Tegias da cuolm, pauschal	100.00 – 200.00	100.00	136.10
Taxa fundamentala per habitaziun ed onn	200.00 – 350.00	220.00	299.40
Surfatscha da habitar netta per m ² (max. 150 m ²)	8.00 – 15.00	9.00	12.25

- b) La radunonza da vischnaunca ha approbau cun 36 vuschs gie d'adattar las taxas da turissem naven dils 1 da schaner 2027 sco suonda:

2. Taxa da turissem digl artechel 10 dil regulativ davart la taxa da hosps e la taxa da turissem

La taxa da turissem vegn incassada annualmein e munta:

- a) per tuts obligar ina taxa fundamentala da frs. 200.00 (negin alzament)
b) per alloschaders tenor art 12 lit. a) e b) LT

categoria	Altezia min. tochen max.	Naven da 1.1.2015	Naven da 1.1.2027
hotels, per combra	150.00 – 300.00	150.00	159.15
habitaziuns da vacanzas, per meter quadrat dalla surfatscha da habitar netta (max. 150 m ²)	4.00 – 8.00	4.00	4.25
combras privatas, per combra	30.00 – 50.00	30.00	31.85
alloschaments da gruppa, per plaz da durmir	20.00 – 50.00	20.00	21.20
campadis, per plaz da campar	75.00 – 150.00	75.00	79.60

c) **La radunonza da vischnaunca ha approbau cun 35 vuschs gie d'adattar ils promils dalla summa da paga dall'AVS pils ulteriurs obligai naven dils 1 da schaner 2027 sco suonda:**

- c) pils ulteriurs obligai da pagar la taxa numnai en art. 10 dil regulativ vala ina taxa denter 1‰ tochen 4‰ dalla summa da paga dall'AVS dallas persunas occupadas, inclus il proprietari/meinagestion e ses confamiliars en proporziun cun lur dependenza dil turissem e dalla creaziun da valur.

Interpresas cun ina dependenza dil turissem ein classificadas tenor la bransch, lur dependenza e lur creaziun da valur cun puncts naven da 2 entochen 5. Tenor art.10 dil regulativ ei la cumpart definida sco suonda. Las differentas branschas culs puncts defini ein veseivlas ell'aschunta I. La taxa en ‰ che vegn adossada naven dils 1.1.2027 ei vegnida rundada engiu ni ensi. Quei per motiv dalla praticabladad.

categoria	Altezia min. tochen max.	Naven da 1.1.2015	Naven da 1.1.2027
2 puncts	1‰ – 4 ‰	1.2 ‰	1.3 ‰
2.5 puncts	1‰ – 4 ‰	1.5 ‰	1.6 ‰
3 puncts	1‰ – 4 ‰	1.8 ‰	1.9 ‰
3.5 puncts	1‰ – 4 ‰	2.1 ‰	2.2 ‰
4 puncts	1‰ – 4 ‰	2.4 ‰	2.6 ‰
4.5 puncts	1‰ – 4 ‰	2.7 ‰	2.9 ‰
5 puncts	1‰ – 4 ‰	3.1 ‰	3.3 ‰

d) **La radunonza da vischnaunca ha approbau cun 35 vuschs gie ed ina abstenziun d'adattar la vegliadetgna per la deliberaziun dalla taxa da hosps sin 6 onns**
(lescha davart la taxa da hosps e la taxa da turissem art. 6 al. a))

L'adattaziun dallas taxas da hosps e las taxas da turissem va en vigur **naven dils 1 da schaner 2027**, sut la cundiziun che l'istanza cumpetenta da l'autra vischnaunca (Tujetsch resp. Disentis/Mustér) detti medemamein il consentiment.

Tractanda 6 Orientaziuns

Il president communal fa attents che las cuviartas da votar seigien damaun en scaffa da brevs e che sil termin official dils 10 da matg 2026 seigi negin semess a disposiziun sco candidata ni candidat per la suprastanza communal.

La radunonza da vischnaunca ch'eri previda pils 24 da zercladur 2026 vegni stuschada anavon sils 17 da zercladur 2026. Sin tractanda stettien las elecziuns dallas commembras e dils commembers dallas cumissiuns permanentas sco era ina informaziun davart la sanaziun e valurisaziun dil baghetg da scola a Sedrun. La radunonza da vischnaunca pertuccont l'approbaziun dil credit d'investiziun per la sanaziun dil baghetg da scola vegni carteivlamein ad haver liug ils 19 d'uost 2026.

Daniel Schmid, gerau dalla cultura, fa attents sillas festivitads da 700 onns "Vicini da Tuvez". Il flyer seigi ella scaffa da brevs ed ils 23 da matg 2026 entscheivi l'emprema occurrenza a Selva. En mintga vitg resp. uclaun da Tujetsch detti ei in eveniment ed il settember hagi liug ina gronda fiasta a Sedrun.

Nicole Giossi fa attents che las pendicularas a Mustér mondien sonda, ils 23 da matg 2026 ella stagiun da stad.

Tractanda 7 Varia

Negin pren il plaid sut varia.

Il president communal engrazia per la presenza, la participaziun e la confidanza. El siara la radunonza da vischnaunca allas 21.30 e giavischa in bien retuorn a casa.

Protocollista:
Simona Giossi

President communal:
Martin Cavegn